

# Nihánj me síj vij yanj cartá qui'yaj sí cu'naj Pabló ca'néé so' rihaan sí cu'naj Timoteo a

**1** 'Uñj nihánj me sí cu'naj Pabló, ne cune' Jesucristó mán 'uñj guún 'uñj apóstol nata' rihaan yuvij se vaa gaa i'na' ní' nu' cavii nu' ca'anj qui'yaj Jesucristó, ne yo' me suun me rá Diose qui'yaj sunj adonj.

<sup>2</sup>Yáá 'uñj yanj nihánj ca'nej 'uñj rihaan so' sij cu'naj Timoteo a. 'Ee rá 'uñj mán so', tinuj. Ase vaa 'o ta'níí 'uñj, danj vaa so' rihanj á. Me rá 'uñj qui'yaj ndo'o Diose Rej ní' do', Jesucristó sij 'nij ra'a man ní' do', se luj che'é so', ne me rá 'uñj gaa 'ee rá roj so' mán so', ne gaa xej nimán so', qui'yaj roj so' a.

**Nana nihánj taj xna'anj se vaa  
guun niha' doj rá ní' qui'yaj  
suun ní' rihaan Diose a**

<sup>3</sup>Dan me se 'uñj nihánj me sí 'yaj suun rihaan Diose ndaa vaa qui'yaj nij xíí 'uñj gaa naá, ne nuvi' cacun' tumej mei. Ne dan me se tananj nagó' 'uñj graciá rihaan Diose che'é so', ne yo'o nuú raj mán so', ne 'o achíín ni'yáj che'é so' rihaan Diose nuvíi nigan' ei. <sup>4</sup>Ne na'nuj rá 'uñj se vaa ta'veé so' gaa tanáj 'uñj mán so', ne che'é dan me ndo'o rá 'uñj

quene'en uún 'uñj mán so', gaa ne cunuú cuuj nimanj qui'yáá so', raj a. <sup>5</sup>Dan me se achíín ni'yáá 'uñj che'é so' che'é se nuú rá 'uñj se vaa ne tiha' yu'unj so' mei. Ya nocó' so' man Diose, ne dan me se tucuáán nicaj níí so' chana cu'naj Eunice ga Xcuá'áán so' chana cu'naj Loida ro', nicaj ma'an so' uún, raj a. <sup>6</sup>Che'é dan cataj xna'anj 'uñj rihaan so' se vaa yuun che'e ca'nej so' nimán so' qui'yaj suun so', ndaa vaa rqué Diose se nucuaj mán so' qui'yaj suun so', gaa cutaj ra'aj raá so' á. <sup>7</sup>'O se nuveé sij chu'vi' nimán me ní', qui'yaj Diose ma'. Tananj nari' nucuaj nimán ní', ne nuu 'ee rá ní' tuvi' ní', ne tumé ní' man ní' me daj 'yaj ní', qui'yaj Diose adonj.

<sup>8</sup>Che'é dan se guun na'aj so' nata' so' rihaan yuvij che'é síí 'nij ra'a man ní' mei. Ne se guun na'aj so' che'é se 'nij 'uñj taga' ma'. Se cuchu'ví' so' quírán' so' sayuun ma'. Raçuíj so' manj ca'mii natáj ní' se-nana Diose nana sa', ne Diose me síí qui'yaj guun nucuaj ní' adonj. <sup>9</sup>Ne Diose me síí tinanii man ní' rihaan sayuun, ne canacúún

so' man ní' canoco' ní' man so' ei. Nuveé che'e suun qui'yaj suun ma'an ní' me qui'yaj Dioso danj ma'. Maan se danj guun rá ma'an so' qui'yaj so', ne guun rá so' qui'yaj uun so' se luj che'é ní' ei. Asij ataa qui'yaj so' chumii, ne qui'yaj so' se luj che'é ní' che'é se sij noco' man Jesucristó me ní' a. <sup>10</sup>Ne yaj me se tihaan Dioso rihaan ní' nu' se sa' nuu nimán so', se vaa ca'na' Jesucristó sí tinanii man ní' rihaan sayuun, qui'yaj Dioso a. Yaj me se se ca'vee cavi' ní', qui'yaj Jesucristó yaj a mei. Tzaj ne yo'o gaa i'na' nimán ní' ga Dioso nu' cavii nu' ca'anj, qui'yaj so', ne danj taj se-nana Jesucristó nana sa' adonj.

<sup>11</sup>Ne 'unj nihánj me sí cune' Dioso se vaa guún 'unj apóstol nata' nana yo' rihaan yuvii, ne tucu'yonj nana yo' man yuvii adonj. <sup>12</sup>Maan che'é dan rán' 'unj sayuun nihánj cuano, tzaj ne ne na'aj 'unj a doj se vaa rán' 'unj mei. 'O se ne'én 'unj se vaa Dioso me sí cuchumán raj ni'yaj 'unj man, ne guun ya raj se vaa uun nucuaj so' tumé so' manj qui'yaj sunj nu' suun ca'ne' so' rihanj, ne danj inanj qui'yaj so', raçuíj so' manj ndaa güii ca'na' uún Jesucristó adonj.

<sup>13</sup>Dan me se aj cunó so' nij nana ya ca'mii 'unj rihaan so' á. Ne ase cunó so' ro', danj qui'yáá so', ne yo'o gaa nucuaj rá so' man Dioso, ne gaa 'ee rá so' man tuví' so' che'é se sij noco' man Jesucristó mé so' á. <sup>14</sup>Ne Nimán Dioso nuu nimán so' ro', raçuíj mán so' se vaa yo'o qui'yaj suun so' suun sa' suun ca'ne' Dioso rihaan so' qui'yáá so' á. Ne ve'é nıcaj so' tucuáán sa' narí' so' á.

<sup>15</sup>Aj ne'én so' se vaa cunudanj nij sí cuchumán rá ni'yaj man Jesucristó yanj estadó Asia ro', tanáj nij so' manj, ne canoco' nij so' yo'ó tucuáán a. Vij tuvi' nij so' me sí cu'naj Figelo do', sí cu'naj Hermógenes do' a. <sup>16</sup>Me rá 'unj gaa 'ee rá Dioso man nij tucua sí cu'naj Onesíforo a. 'O se aj guun que'ee ndo'o racuíj so' manj, ne ndaa nuu cuij nimán 'unj qui'yaj so', ne ne guun na'aj so' se vaa 'nij 'unj taga' ma'. <sup>17</sup>Tzaj ne gaa ca'na' so' chuman' Romá, ne cuaj nano' so' manj, ne nari' so' manj ei. <sup>18</sup>Me ndo'o raj gaa 'ee rá sí 'nij ra'a man ní' man so' se vaa se quiran' so' sayuun gaa güii ca'na' uún sí 'nij ra'a man ní' rihaan chumii nihánj a. Ne so' me sí ne'en doj rihanj se vaa qui'yaj suun ndo'o sí cu'naj Onesíforo che'é ní' sij noco' man Jesucristó gaa cane so' chuman' Efeso a.

**Nana nihánj taj xna'anj se vaa se cunánj ní' rihaan sayuun a**

**2** Ase vaa 'o ta'nıj, danj vaa so' rihanj, tinuj. Ne me rá 'unj ca'vej rá so' nari' nucuaj nimán so', qui'yaj Jesucristó sí 'yaj ndo'o se luj che'é ní' a. <sup>2</sup>Dan me se man ndo'o sí cunó nana cataj xna'anj 'unj rihaan so', ne me rá 'unj tucu'yón so' nana yo' man doj nij snó'o luj nicaj tuvi' ga so' guun nij so' sí gaa nucuaj nimán nata' rihaan yuvii guun nij so' uún a.

<sup>3</sup>Se cuhu'ví' so' quirán' so' sayuun che'é se sij noco' man Jesucristó mé so' mei. Maan se ase vaa uno tanuu nana a'mii tanuu uun chij ro', danj gaa cunó ma'an

so' se-nana Jesucristó á. <sup>4</sup>Dan me se vaa nij tanuu 'nij cuarteé, ne ne avii yaníj nij so' 'yaj suun nij so' ma'. Maan se ve'é 'yaj suun nij so' inanj suun a'ne' nii rihaan nij so', che'é se me rá nij so' guun niha' rá tanuu uun chij ni'yaj so' man nij so' a. Ne ase 'yaj guee tanuu, danj qui'yáa so', ve'é qui'yaj suun so' rihaan orún' Jesucristó á. <sup>5</sup>Dan me se veé danj 'yaj nij sí tico canaán uún, ne no xcúún nij so' cuno sa' nij so' nu' suun a'ne' nii rihaan nij so' qui'yaj nij so' adonj. Tzaj ne sese se cuno sa' nij so' suun a'ne' nii rihaan nij so' qui'yaj nij so', ne daj chihaa míj se qui'yaj canaán nij so' cachriin yâj cunuû raá nij so' ma'. Che'é dan sese me rá so' qui'yaj canaán so' ni'yaj Jesucristó, ne ve'é cunó so' rihaan so' ei. <sup>6</sup>Ne veé danj vaa sí 'yaj suun ndo'o naa uún, ne gaa rii nii naa, ne so' me sí quirí' tan' asino yaan gaa cuxra' ta'aj nii tan' uún adonj. Ne ase vaa ran' sí 'yaj suun naa ro', danj quirán' ma'an so', ne cavii sa' uxrá so' sese yo'o qui'yaj suun so' che'é Diose ei. <sup>7</sup>Cunó so' nana nihánj, ne racúj Diose mán so' nari' so' cunudanj yo'ó nij nana chuguanj.

<sup>8</sup>Se quini'yón so' man sí cu'naj Jesucristó a doj mei. Se quini'yón so' se vaa cunu i'na' uún so' gaa cavi' so', ne se quini'yón so' se vaa noco' xna'anj tuvi' so' ga sí cu'naj David sí cayáan gaa naá mei. Nihánj me nana sa' a'mii natáj 'unj á. <sup>9</sup>Che'é nana nihánj quirán' 'unj sayuun, ne ndaa 'nij 'unj taga', ne nda' rá se vaa ran' sí tumé cacun' chuguanj. 'O se taj se 'yaj mei. Xa' se-nana Diose, tzaj ne

se ca'vee numíj nii man yo' do', se ca'vee caxrii' nii taga' man nana yo' do' mei. <sup>10</sup>Che'é dan ne chu'ví' 'unj quirán' 'unj me ma'an sayuun che'é nij sí narii Diose man ma'. 'O se danj gaa quirán' 'unj, gaa ne ca'vee cavii sa' nij so' ga 'unj che'é se vaa qui'yaj Jesucristó che'é ní', ne ve'é ndo'o gaa ní' ga Diose nu' cavii nu' ca'anj a. <sup>11</sup>Ya vaa nana nihánj ei. "Ne sese aj cavi' ní' ga so', ne gaa i'na' ní' ga so' uún a. <sup>12</sup>Sese se cunanj ní' rihaan sayuun, ne guun chij ní' ga so' uún a. Sese cataj ní' se vaa nuveé sij noco' man so' me ní', ne cataj so' se vaa nuveé tuvi' so' me ní' uún a. <sup>13</sup>Nda' se ne sa' rá ní' ga so', tzaj ne so' me se sa' inanj so' ga ní' uún a. 'O se ne ne'en so' naqui'yaj ino' so' nana ca'mii so' rihaan ní' a man adonj". Nana ya cuno ní' me nu' nana nihánj ei.

**Nana nihánj taj xna'anj se vaa se cuno ní' nana a'mii rma'an yuvii ma'**

<sup>14</sup>Dan me se cataj xna'anj so' rihaan nij sí noco' man Diose se vaa se quini'yón nij so' nana nihánj mei. Ne nago' so' chrej nucuaj man nij so' se vaa se canó tuvi' nij so' che'é nana tucu'yón nij so' ma'. 'O se taj che'é qui'yaj nij so' danj man adonj. Maan se sí quene'en che'é yan unu' nij so' ro', quirí' rá nij so' adonj. <sup>15</sup>Ca'nej nucuaj nimán so', gaa ne ca'vee cataj Diose se vaa sí ve'é qui'yaj suun rihaan so' mé so', ne se cunó rej na'aj rihaan so' che'é suun 'yaj suun so' mei. Tananj nata' nica so' se-nana Diose nana ya ei.

<sup>16</sup>Se nanó xrej so' nana a'mii rma'an ta'aj yuvii ma'. A'mii a'mii

uun nij so', tzaj ne che'é nana a'mii nij so' ro', me se doj a 'yaj nij so' se vaa na'vej rá Diosé qui'yaj nij so' adonj. <sup>17</sup>Ase vaa ran' yuvii nó luj yuvaa ro', danj quiran' nij síi cunō nana a'mii nij so', ne nij doj quiran' nij yuvii uno nana avii tu'va nij so' adonj. Vij tuvi' nij so' me síi cu'naj Himeneo do', síi cu'naj Fileto do' chuguanj. <sup>18</sup>Dan me se cataj roj so' se vaa aj quisíj cunuu i'na' uún nij síi cavi', ne se cunuu i'na' uún doj yuvii, taj roj so' a. Danj tu'va roj so', tzaj ne ne ne'en uxrá roj so' a doj a ma'. Tzaj ne vaa ta'aj yuvii cuchumán rá nana ca'mii roj so', ne che'é dan ca'ne' rá nij yuvii ga suun nucuaj rá man Diosé, qui'yaj roj so', <sup>19</sup>tzaj ne aj cuchruj sca' Diosé tucuáán noco' ní', ne aj naj se-selló so', qui'yaj so' a. Ne nihánj me nana nō rihaan se-selló so' a: “Ne'en síi 'nij ra'a man ní' man nij síi noco' man so' a”. Ne yo'ó nana nō rihaan se-selló so' taj: “Nu' nij síi nata' se vaa sij noco' man síi 'nij ra'a man ní' me nij so' ro', nō xcúún nij so' tanáj nij so' nu' chrej chi'ii á”. Dan me roj nana noco' ní' adonj.

<sup>20</sup>Dan me se ve' tucúa 'o ru'vee me se mán xruj tu'vee ndo'o do', man xruj aga' oró míi do', man xruj aga' platá catzii do' a. Tananj uún, ne vaa xruj nij doj do' uún a. Vaa se rii nii man chruun do', vaa se rii nii man yo'óo niqiii do' a. Dan me se vaa se sa' doj, ne vaa uún se nij doj uún a. <sup>21</sup>Dan me se sese guun yaníj so' ga nij yuvii tu'va rma'an yo', ne ase vaa xruj sa' doj ro', danj gaa ma'an so' rihaan nij so' a. Dan me se inanj suun sa' doj qui'yaj suun so' che'é Diosé, ne guun

nucuáá so' qui'yaj suun so' nu' suun sa' che'é Diosé á.

<sup>22</sup>Tzaj ne se ca'vej rá so' qui'yáá so' ndaa vaa me rá nij síi tachruu qui'yaj nij so' mei. Maan se guun rá so' qui'yáá so' se sa' ni'yaj Diosé á. Gaa nucuaj rá so' man so' á. Gaa 'ee rá so' tuví' so' á. Dínj cayáán so' ga yo'ó nij síi sa' nimán nij síi achíín ni'yaj rihaan síi 'nij ra'a man ní' á. <sup>23</sup>Se ca'vej rá so' cano tuví' so' ga yuvii che'é nana mei. Ne acaj nij síi 'yaj danj cuentá ma'. Sij ataa nari' sa' me nij so' nanj adonj. Ne che'é se vaa 'yaj nij so', che'é dan unu' ndo'o nij so' ga tuvi' nij so' ei.

<sup>24</sup>Ne nó xcúún síi 'yaj suun che'é síi 'nij ra'a man ní' cunu' so' danj ma'. Maan se ve'é qui'yaj so' che'é cunudanj yuvii, ne ve'é tucuyón so', <sup>25</sup>ne tijaan so' chrej sa' man nij síi me rá cunu' ga so' uún a. 'O se xcaj so' cuentá se vaa ca'vee racuíj Diosé man nij so', ne quinano rá nij so' che'é cacun' tumé nij so', ne quinari' nij so' nana ya a. <sup>26</sup>Gaa ne ca'vee xcaj nij so' cuentá, gaa ne quinanii' nij so' rihaan síi chree a. Ne síi chree me se so' me síi tiha' yu'unj man nij yuvii, ne quita'aa so' man nij so', ne cuano nihánj me se 'yaj so' ndaa vaa me rá ma'an so' qui'yaj so' man nij so' adonj.

**Nana nihánj taj xna'anj daj  
qui'yaj nij síi chi'ii asa' nichrun'  
ca'na' uún Jesucristó a**

**3** Ne'en so' se vaa asa' nichrun' ca'na' uún Jesucristó, ne guun ndo'o sayuun a. <sup>2</sup>'O se gaa 'ee uxrá rá nij yuvii man ma'an yuvii, ne guun ndo'o rá nij yuvii qui'yaj

canaán nij so' sa'anj, ne cataj uxrá nij so' se vaa sij sa' ndo'o me ma'an nij so', ne nij ndo'o ca'mii nij so' che'é Diose uún a. Se cuno nij so' ca'mii rej nij so' do', nii nij so' do', uún ma'. Ca'mii nij so', ne se nago' nij so' graciá che'é rasuun, ne se guun rá nij so' canoco' nij so' man Diose mei. <sup>3</sup>Se gaa 'ee rá nij so' man tuvi' nij so', ne o ra'yunj tuvi' nij so', ne nano' ndo'o nij so' cuentó ne che'é tuvi' nij so', ne se guun na'aj nij so' ni'yaj nij so' man nij so' mei. Ne se guun nucuaj nij so' ca'ne' rá nij so' ga suun chi'ii nicaj nij so' mei. Inanj quij gaa nij so' ei. Ne inanj quinachri' nij so' ni'yaj nij so' rasuun sa' ei. <sup>4</sup>Ne inanj síi tiha' yu'unj tuvi' guun uún nij so' ei. Ne inanj ca'nej nimán nij so' qui'yaj nij so' chrej chi'ii ei. Ne yo'o ndaa raan rma'an cumán se nucu'í rá nimán nij so', ne inanj nano' nij so' rasuun me rá ma'an nij so' a. Se nano' nij so' a doj man Diose a ma'. <sup>5</sup>Ase vaa yuvii noco' Diose ro', danj gaa nij so', tzaj ne daj chihaa mij se ca'vej rá nij so' naqui'yaj sa' Diose nimán nij so' ma'. Naxuun yanij so' mán so' rihaan nij síi vaa danj ei.

<sup>6</sup>Atúj nij so' rá ve' tucua' chana ne nicaj cuentá, ne tiha' yu'unj nij so' man nij chana atá daj a cacun' quij avii raá ma'an no' a. <sup>7</sup>Niganj tucu'yón nij chana yo' nu' nana sa', tzaj ne daj chihaa mij ne guun nucuaj nij no' xcaj nij no' cuentá che'é nana ya yo' a mei. <sup>8</sup>Ne xa' nij síi chi'ii yo', tzaj ne nda' rá se vaa quiran' 'o síi chruun cu'naj Janes ga síi chruun cu'naj Jambres gaa quitáa ri'yunj roj so' man síi cu'naj Moisés gaa naá ro', danj quiran'

guee nij síi taj ri'yunj man inanj nana sa' ei. 'O se síi man inanj nana chi'ii raá me nij so' do', síi aj tanáj xco man Diose do', me nij so' ei. <sup>9</sup>Tzaj ne se quisj nij so' xna'anj nana chi'ii yo' ndaa gan' ndo'o qui'yaj nij so' mei. 'O se cunudanj nij yuvii man rihaan chumii xcaj cuentá se vaa sij nij snúu rma'an me nij so', ne se cuchumán rá nij yuvii a doj ca'mii nij so' mei. 'O se nda' rá se vaa quiran' roj síi cu'naj Janes ga síi cu'naj Jambres gaa ne cuchuman rá yuvii ca'mii roj so' ro', danj quiran' nij síi chi'ii yo' ei.

**Nana nihánj taj xna'anj se vaa nda' se quiran' ní' sayuun, tzaj ne yo'o canoco' ní' se-nana Diose a**  
<sup>10</sup>Ne xa' ma'an so', tzaj ne xcaj ndo'o so' cuentá che'é nana tucu'yón 'unj man yuvii do', che'é tucuaán noco' 'unj do', che'é se vaa guun raj qui'yaj rej rihaan ní' do' a. Ne'én so' se vaa nucuaj ndo'o raj man Diose do', se vaa nanaj rá 'unj caxrii yuvaa 'unj man yuvii do', se vaa 'ee raj man tinúj do', se vaa yo'o nucuaj rá 'unj rihaan sayuun do' ei. <sup>11</sup>Ne aj ne'én so' daj vaa sayuun qui'yaj nii manj, ne aj ne'én so' nu' se vaa quirán' 'unj chuman' Antioquía do', chuman' Iconio do', chuman' Listra do', uún chuguanj. Tzaj ne síi 'nij ra'a man ní' me síi tinanii manj rihaan nu' sayuun quirán' 'unj ei. <sup>12</sup>Dan me se cunudanj uún nij yuvii me rá canoco' man Diose yuvii amán rá ni'yaj man Jesucristó ro', quirán' sayuun uún che'é Jesucristó ei. <sup>13</sup>Tzaj ne xa' nij síi tiha' yu'unj, tzaj ne tananj a doj a doj a ca'anj

nij so' tihá' yu'unj nij so' man nij yuvií do', tihá' yu'unj nij yuvií man nij ma'an nij so' do' ei.

<sup>14</sup>Ne ma'an so', tzaj ne yo'o canocó' so' nana cuchumán rá so' nana nari' so' á. 'O se aj ne'én so' me ní me roj chana tucuyón nana yo' mán so' ei. <sup>15</sup>Ne aj ne'én so' se vaa asij ne'ej mé so', ne quene'én so' daj taj nij yanj guee, ne yanj yo' me se qui'yaj ca'vee xcaj ní' cuentá, ne che'é dan cuchumán rá so' ni'yaj so' man Jesucristó, ne cavii sa' so' nu' cavii nu' ca'anj yaj adonj. <sup>16</sup>'O se ma'an Diosé qui'yaj cachrón nii nu' nana man rihaan yanj yo' adonj. Ne che'é dan vaa se guun ndo'o man nana yo' rihaan ní' adonj. 'O se vaa ndo'o rasuun nari' ní' uno ní' nana man rihaan yanj yo', ne taj xna'anj yo' rihaan ní' che'é cacun' tumé ní', ne axrj yuvaa yo' man ní' che'é cacun' 'yaj ní', ne tucuyón yo' man ní' daj qui'yaj ní' ve'é qui'yaj ní' canoco' ní' man Diosé, ne taj xna'anj yo' rihaan ní' daj gaa sa' nimán ní' uún a. <sup>17</sup>'O se ní' sij noco' man Diosé me se danj gaa ya, gaa ne yo'o ca'vee cunuú nana sa' nimán ní', ne yo'o qui'yaj ní' daj a rasuun sa' ei.

**Nana nihánj taj xna'anj se vaa se ca'ne' rá ní' ga suun a'mii natáj se-nana Diosé rihaan yuvií ma'**

**4** Cuno nihánj me se me rá 'unj cuno Diosé cuno Jesucristó sí ca'na' uún guun chij rihaan chumii nihánj sí ca'ne' cacun' che'é sí vaa i'na' do', che'é sí cavi' do', se vaa ca'ne' yá 'unj suun rihaan so' <sup>2</sup>ca'anj so' nata' so' nana sa' á. Taj se 'yaj sese vaa ya'núj rihaan so' do',

se ne vaa ya'núj rihaan so' do', taj se 'yaj ma'. Maan se ca'mii natáj yá so' ei. Cataj xna'anj so' rihaan yuvií che'é cacun' tumé nij yuvií, ne cataj so' se vaa nij ndo'o 'yaj nij so', ne nago' so' chrej nucuaj man nij so' qui'yaj nij so' inanj se sa' ei. Tzaj ne se gaa ra'yanj rá so' caxrii yuvaa so' man nij yuvií mei. Tananj yo'o gaa inaj nimán so', ne ve'é tucuyón so' man nij so' ei. <sup>3</sup>'O se vaa güii, ne se ca'vej rá nij yuvií cuno nij yuvií nana 'yaj ca'vee cunu sa' nimán nij so' man chuguanj. Maan se guun rá nij so' cuno nij so' yo'o nana naca, ne che'é dan nana' nij so' que'ee sí tucuyón yo'o nana me rá ma'an nij so' man nij so' a. <sup>4</sup>Ne ca'anj nij so' rej nuvi' nana ya cuno nij so', ne nanj cuentó ne cuno nij so' a. <sup>5</sup>Tzaj ne so' me se ca'nej sa' inanj so' tucuaán sa', ne gaa inaj nimán so' gaa rán' so' sayuun, ne yo'o nata' so' se-nana Diosé rihaan nij sí ataa xcaj cuentá á. Dan me se qui'yaj suun so' nu' suun ca'ne' Diosé rihaan so' á.

<sup>6</sup>Xa' 'unj, tzaj ne nichrun' cavi' 'unj che'é Diosé, ne quinaj chumii nihánj nanj ei. <sup>7</sup>'Unj me se quisij qui'yaj suun uxrá yaj suun ca'ne' Diosé rihanj, ne yo'o canocó' 'unj se-tucuanj Jesucristó, <sup>8</sup>ne cuano nihánj me se maan se na'vij uún 'unj quisij güii ca'na' uún sí 'nij ra'a man ní' rihaan chumii nihánj, ne rque so' 'o cachriin yâj cunuú raá 'unj, ne cataj so' se vaa nuvi' cacun' taj xraj a. Dan me se cuese nica' nimán ya me Jesucristó, ne nuveé che'e orún' 'unj me qui'yaj so' danj ma'. Ne veé danj qui'yaj so' che'é cunudanj nij yuvií me ndo'o rá ca'na' uún so' rihaan chumii nihánj nanj adonj.

Nana nihánj taj xna'anj se vaa  
cuchi' Timoteo rihaan Pabló a

<sup>9</sup>Ra'yanj ca'na' so' rej nuu  
'unj nihánj ca'na' so' ni'yaj so'  
manj ei. <sup>10</sup>'O se tanáj sí cu'naj  
Demas manj, che'é se caran' doj  
rá so' ni'yaj so' rasuun man  
rihaan chumii nihánj, ne ca'anj  
so' chuman' Tesalónica nanj ei.  
Sí cu'naj Crescente ca'anj estadó  
Galacia, ne sí cu'naj Titó ca'anj  
estadó Dalmacia ei. <sup>11</sup>Daj orún'  
sí cu'naj Lucas nicun' ga 'unj  
nihánj cuano nanj ei. Nícaj  
so' man sí cu'naj Marcos ca'na'  
so' ei. 'O se vaa ndo'o suun  
qui'yaj suun 'unj, ne racuíj  
so' manj, raj a. <sup>12</sup>Ne sí cu'naj  
Tíquico me se ca'néj 'unj man  
so' ca'anj so' chuman' Efeso ei.  
<sup>13</sup>Tanáj 'unj se-rotó 'unj tucúa  
sí cu'naj Carpo sí ne chuman'  
Troas, ne nícaj so' man yo' ca'na'  
so' doj ei. Dan me se nícaj so'  
nij dáán 'unj do', nij yanj nuj  
xcuu do', ca'na' so', che'é se  
ra'yanj ndo'o achiin yo' manj  
nihánj ei.

Nana nihánj taj xna'anj se  
vaa qui'yaj ndo'o sí cu'naj  
Alejandro sayuun man Pabló a

<sup>14</sup>Dan me se xa' sí cu'naj  
Alejandró sí 'yaj suun aga',  
tzaj ne qui'yaj ndo'o so' sayuun  
manj, ne narque sí 'nij ra'a  
man ní' sayuun man so' che'é  
sayuun qui'yaj so' manj, raj a.  
<sup>15</sup>'O se tadó so' ga so' se gaa nanj  
qui'yaj so' sayuun mán so' á. 'O  
se na'vej uxrá rá so' cuno yuvii  
se-nana ní' a ma'.

Nana nihánj taj xna'anj se vaa  
racuíj Jesucristó man Pabló gaa  
canicun' Pabló rihaan cuese a

<sup>16</sup>Gaa ca'anj 'unj rihaan nij sí  
nicaj suun qui'yaj nii, ne nuvi' a 'ó  
tinúú ní' racuíj manj a ma'. Maan  
se tanáj cunudanj nij so' man orún'  
'unj rihaan nij sí nicaj suun, tzaj ne  
na'vej raj caraa Diose cacun' xráá  
nij so' a mei. <sup>17</sup>'O se canicun' sí 'nij  
ra'a man ní' ga 'unj, ne so' me sí  
qui'yaj guun nucuáá 'unj natá' 'unj  
nu' se-nana Diose cuno cunudanj  
nij yuvii yaníj, ne tinanii so' manj  
rihaan sayuun nocoo, <sup>18</sup>ne so' me  
sí tinanii manj rihaan daj a se nij  
me rá nii qui'yaj nii manj, ne so' me  
sí qui'yaj cavii sa' 'unj cayáán 'unj  
ga so' asa' nanij so' rej xta' ne guun  
chij so' rihaan chumii nihánj a. Ve'é  
inanj ca'mii ní' che'é so' nu' cavii nu'  
ca'anj á. Ve'é danj gaa ya ei.

Nana nihánj taj xna'anj  
se vaa ve'é cuman nij tuví'  
Timoteo, rá nij tuví' Pabló a

<sup>19</sup>Me rá 'unj se vaa ve'é cuman  
chana cu'naj Prisca do', nica no' sí  
cu'naj Aquila do', nij tucua sí cu'naj  
Onesiforo do' ei. <sup>20</sup>Quináj sí cu'naj  
Erasto chuman' Corinto, ne sí cu'naj  
Trófimo me se ran' so' a. Che'é dan  
tanáj 'unj man so' chuman' Mileto  
nanj ei. <sup>21</sup>Ra'yanj ca'na' so' nihánj  
yaj gaa ataa ca'na' yavii acoj ndo'o a.  
Ve'é cayáán so', rá sí cu'naj Eubulo  
do', sí cu'naj Pudente do', sí cu'naj  
Lino do', chana cu'naj Claudia do',  
taran' nij tinúú ní' do' ei. <sup>22</sup>Me rá  
'unj cayáán sí 'nij ra'a man ní' ga  
nimán so', ne qui'yaj ndo'o Diose se  
luj che'é nij soj a.